

還丹至樂篇

悟玄子賢芝 唐 圖 述

余就至術久辛勤撈漉仙經二十春偶向火
中求白汞瞥然水裏覩鉛銀始知不枉平生
志醒悟從來夢幻身長髮沈檀香一炷洗心
朝禮玉皇真

愧慙一卒起轅門豈料烏光照覆盆指得五
行來往剋識他龍虎競相吞轉南為北成從
北弃有存無無却存除却志同方始話非其
人處不言論

實知得遇是天然塵中凡眼見丹田神理暗
中垂懸點仙經卷裏悟精專黃芽鍊向爐中
觀聖石修來掌上着志脫塵埃身未脫目前
萬事盡成閑

因覽參同覺眼明黃芽只在世間生人人顛
倒無尋處箇箇昏迷空遠行四物周回為始
蒂兩般和會契初萌河車漸變牙胎質轉却
青龍白虎形

悟得真鉛返却驚塵中身恐恨神明未修功
行根機淺處在凡蒙慮骨輕自此有心憐水

土從今無意懸金瓊乾坤鼎就年周滿攜取
丹瓢往赤城

傳聞出世有仙丹學者如麻得者難只鍊四
黃攻八石不知龍虎作何顏區區但展經書
讀矻矻長開萬卷看動便辛勤三十載鬢霜

終不識真鉛

百億人求不可求古今此事甚深幽南方事
體當未夏北治容光轉白秋苦志鍊來無計
鍊專心修處擬何修欲尋尋得天涯遍未遇
生前雪滿頭

仙丹神術事深奇古往今來得者希淺智度
量何所見上人思忖尚懷疑從無入有神難
測自有從無聖不知莫怪仙經長隱秘留傳
只恐泄天機

還丹浩渺實難窮無分千生不可達得了隱
藏須守護莫將金玉貴相同成來燕雀養為
鳳悟了蛇魚食化龍如此神功難可述豈因
循話向愚蒙

須知不易得周圓實是千難與萬難舉世只
知微小術誰人肯學大還丹金銀共說皆聞

喜鉛汞才聞似夢間如此錯來經百萬未登
五十鬢先斑

還丹至樂篇